

# DARI SEBULAN KE BULAN

**Menurut** siaran akhbar Melayu tempatan Tengku Abdul Rahman Putra, Ketua Menteri Persekutuan Tanah Melayu, berniat hendak pergi haji tahun hadapan. Kerana kononnya telah sampai cita-citanya dikabulkan Tuhan menjadikan Malaya merdeka pada 31 Ogos 1957. Berita ini patut disambut dengan suatu harapan nanti apabila beliau tawaf di Kaabah tahulah beliau bahawa di dalam kehidupan sebagai seorang Muslim beliau bertanggungjawab untuk menegakkan negara Islam di Malaya ini dan tahulah ia akan erti bahawa hidup dan mati seorang Islam itu adalah kerana menunaikan perintah Allah yang satu daripadanya ialah supaya hukum-hukum Allah itu berlaku di dalam negerinya dan hukum-hukum Allah tidak sempurna melainkan berdiri sebuah negara Islam.

Kalau beliau hanya pergi haji sekadar mencari serban dan nama Haji Tengku Abdul Rahman Putra sahaja maka pemergian itu tidak ada ertinya dengan sifat beliau sebagai seorang Islam.

\* \* \*

Encik Hamzah Alang, Setiausaha Agung UMNO Selangor dalam ucapan di dalam Persidangan Khas UMNO di Kuala Lumpur, baru-baru ini di antara lain-lain mengatakan bahawa ia meminta kerajaan Persekutuan (Perikatan) berhati-hati di dalam melantik duta-duta atau anggota-anggota diplomatnya yang bakal dihantar ke luar negeri. Ia tidak suka duta-duta atau diplomat-diplomat itu dilantik kerana memandang bahawa mereka adalah “pejuang-pejuang UMNO” yang telah bertahun-tahun lamanya tungkus lumus, tetapi tidak mempunyai kelayakan yang tertentu. Ia mengingatkan juga supaya duta-duta atau

diplomat-diplomat itu hendaknya mereka yang benar-benar berkelayakan dan mempunyai pesonaliti.

“Suara” yang dibawa oleh Encik Hamzah Alang ini adalah suara yang patut mendapat perhatian, kerana di dalam masa peralihan yang serupa ini orang-orang yang *opportunist* di dalam UMNO selalu mendesak supaya ia mendapat jawatan-jawatan sebagai balasan jasanya kepada perjuangan-perjuangannya di dalam UMNO atau kerajaan Perikatan itu. Jika yang semacam itu dibawa maka tentunya yang menderita adalah rakyat sebab rakyat itu yang akan terpesona atau terbabit kerana sudah terang bahawa kerosakan yang dibuat oleh orang-orang yang tidak berkelayakan itu akan merosakkan pertalian di antara sebuah negara dengan negara lain. Kita berharap teguran-teguran yang didatangkan seperti itu bukannya sahaja terhadap Duta-Duta tetapi juga terhadap perkara-perkara pertadbiran di dalam negeri.

\* \* \*

Inspektor –inspektor polis Persekutuan Tanah Melayu yang dinaikkan pangkat menjadi Penolong Superitendan Polis didapati hanya tiga orang Melayu sahaja. Hal yang demikian ini patutlah diperhatikan oleh orang-orang Melayu sendiri tentang kelemahannya dalam bahagian polis itu. Yang ditakuti kalau dalam Malaya merdeka keadaan yang seperti di Singapura – anak buah polis kebanyakannya terdiri dari orang-orang Melayu tetapi pegawai-pegawaiannya kebanyakannya terdiri dari orang-orang yang bukan Melayu – yang demikian ini besar merbahayanya kepada keselamatan orang-orang Melayu pada masa akan datang.

\* \* \*

UMNO Klang telah mengambil suatu keputusan menolak Sultan Johor dicalonkan menjadi Yang di-Pertuan Agong bagi Malaya Merdeka. Langkah ini dipandang adalah suatu langkah yang kurang bijak, kerana dengan cara-cara itu tentulah menimbulkan suatu perbalahan di antara UMNO Klang dengan UMNO Johor kerana walau bagaimanapun UMNO Johor tentu tidak akan menyertai sesuatu keputusan yang bakal menentang Sultannya. Adalah dijangka UMNO Johor akan membidas UMNO Klang di dalam Persidangan Agung UMNO di Kuala Lumpur akhir bulan ini. Sebaik-baiknya dalam masa hampir merdeka ini orang-orang UMNO jangan mencari perbalahan dalam hal-hal yang boleh dibiarkan begitu sahaja dengan dicari suatu jalan lain.

\* \* \*

Pendeta Za'ba di dalam ucapan radionya "berkehendak supaya bahasa dan persuratan Melayu kita kembangkan, diluaskan dan disesuaikan dengan keperluan memakainya sebagai bahasa pengantar di sekolah-sekolah menengah Melayu dan kemudian di sekolah-sekolah tinggi, dan menjadi bahasa rasmi dalam kerja-kerja pemerintahan Malaya merdeka. Kita berkehendak sekalian itu diusahakan dengan segala daya upaya dan ikhtiar terutama menerusi Dewan ini." (Dewan Bahasa dan Pustaka – P).

Keyakinan Pendeta Za'ba dalam hal ini, menurut pandangan sebahagian orang, tidak akan terlaksana sekiranya orang-orang Melayu yang memegang teraju pemerintahan di negeri ini tidak menumpukan perhatian kepada perkara ini. Perkembangan bahasa ini tidaklah hanya diserahkan kepada Dewan Bahasa dan Pustaka itu sahaja sendiri tetapi juga sepatutnya digalakkan usaha-usaha di dalam penerbitnya Melayu sendiri – yakni kerjasama di antara Dewan Bahasa dan Pustaka dengan penerbit-penerbit Melayu mestilah dieratkan pertaliannya – yang boleh menyuburkan penerbit-penerbitnya itu. Hidup di dalam perkembangan yang menuju kepada bahasa Melayu berdaulat.

Pendapat ini adalah berpandu kepada keadaan-keadaan yang telah sudah di dalam mana penerbitan-penerbitan Melayu ditinggalkan! Buktinya tidak sebuah pun buku-buku pelajaran Melayu di sekolah-sekolah Melayu yang dippunyai oleh kerajaan yang dicetak oleh percetakan melayu. Buku "Anak Raja Dan Anak Papa" terjemahan Pendeta Za'ba yang diuar-uarkan hendak dicetak itu, diberitakan, akan dicetak di dalam percetakan bukan Melayu. Sebabnya tidak lain kerana di dalam board yang mengambil tender bagi percetakan ini tidak ada seorang pun orang-orang Melayu. Mudah-mudahan dalam Malaya merdeka nanti percetakan dan penerbitan Melayu lebih diutamakan - atau sekurang-kurangnya diberi "kuota" kepada mereka yang difikirkan layak. Dengan langkah ini tentulah akan membawa kemajuan kepada penerbit-penerbitnya Melayu – tidak seperti masa yang lalu – perkembangan bahasa dijalankan oleh orang-orang Melayu sedang penerbitan dan percetakan bangsa lain dari Melayu "kenyang".

\* \* \*

Di dalam ucapannya ini juga Pendeta Za'ba menyatakan bahawa ejaan rumi "cara sekolah" yang dikira rasmi selama ini adalah suatu kaedah ejaan yang banyak di dalamnya tidak disetujuinya. Ejaan ini kata beliau, ialah mengikut kaedah Tuan Wilkinson semenjak dari tahun 1902 dahulu yang terpaksa mesti diikuti juga. "Sekarang kita akan merdeka", kata Pendeta Za'ba, "Mengapakah mesti diikut kaedah yang telah diaturkan oleh orang-orang Inggeris itu menurut cara yang lebih munasabah bagi kaedahnya sendiri padahal tentunya yang tidak sesuai dengan kehendak Bahasa Melayu. Bahasa Melayu ialah bahasa kita dan kitalah yang patut mengatur dan menetapkan segala hal ehwal berhubung dengan tulisannya dan lain-lainnya."

Benar apa yang dikatakan beliau ini. Selama ini

-sambungan di muka 49